

Ad Lectorem.



Ultimum exhibetur tibi Vo-
lumen Candide Lector,
sed ordine non dignitate
& materia, quam conti-
net, necessitate: exponit
enim Authorem omnis
gratiæ Christum Dominum Redemptorem
& Salvatorem humani generis, septenos quo-
que gratiæ fontes ex eodem scaturientes sep-
tem dico Ecclesiæ Sacramenta, quæ abundè
gratiam ad Deum unum & trinum, quem
prima Pars Theologiæ contemplatur, per va-
rios virtutum actus, quos altera fusiùs expli-
cat, attingendum & felicissimè ut ultimum
totius Theologiæ speculationis & praxeos ter-
minum obtinendum profundunt; Jungenda
est in hac parte sicut in præcedentibus praxis
Theoriæ & regulanda praxis per Theoriam,
error, utinam non nimium inter eos, qui
Theologiæ scientiæ studiosi videri & dici vo-
lunt, communis, plurimum animos pervasit,
praxin doctrinæ Sacramentalis ex Casuistis esse
desumendam, quid (inquiunt complures)
ad praxin facit, utrum ità definiatur Sacra-
mentum, an talis sit mutatio substantialis in
materia, in forma, hoc subjectum non sit Sa-
cramenti capax ob hujus aliud ob alterius dis-
positionis carentiam, potius legendi sunt Mi-
nistro Sacramenti illi scriptores, qui in parti-
culari

culari circumstantia indicant, quando, quomodo, cui ministrandum sit Sacramentum. Verum ô boni, quantæ molis Volumina legenda erunt, si pro quolibet particulari Casu applicabilem in particulari doctrinam quis exquirat, quot circumstantiæ sunt, qui Casum in Libro expressum mutant: nec tamen prævideri potuerunt, & quotus est, qui accuratè expendat, an contingentia facti Casui figurato per omnia respondeat, ut secundum ejusdem resolutionem in facto tutò procedatur; Principia & Rationes in generali seriò examinatæ atque per oppositarum solutionem stabilitæ prudenter cuilibet particulari Casui applicatæ viam erroribus præcludunt. Fateor Ministro Sacramentorum utilissimum, si non necessarium, esse, ut pro facili expeditione eorum, quæ in hoc ministerio sæpissimè occurrunt, Casus in probatis Authoribus præviderit, sed nisi fundamenta Theologicè expensa antecedenti studio firmaverit, erit similis ei, qui ædificavit super arenam, irruentibus fluminibus motivorum pro opposito practicando, flantibus ventis perplexorum dubiorum, corruet tota structura firmo Fundamento non innixa, destitutus solidis rationibus hærebit consilii inops Minister Sacramenti. Igitur, si quantum in te est, proximum de fructu sacramentali, Sacramentum de valore ex institutione Christi attributo, te ipsum de debita muneris tui executione securum reddere velis, doctrinam sacramentalem

Scho:

Scholasticâ Methodo traditam ex solidis Theologiae principiis acquirere, hâc acquisitâ progredere ad legendos Casus practicè propofitos, eorundem resolutionem ex Theoriâ fundamentis expensam in occurrentibus occasionibus applica; Noveris autem in administratione Sacramentorum, aliter esse practicè arguendum, quam in directione conscientiae quoad honestatem & inhonestatem actuum: non enim hoc modo practicus discursus est concludendus, ut illud inferatur esse faciendum, quod posse fieri probabilius est, sed quo factio, certum est, validum confici Sacramentum, cum in opposito exponatur Sacramentum nullitatis periculo, sive illud sufficere ad valorem minus sive magis sit probabile, quia maximè in Sacramentis, à quibus dependet salus proximi, servanda est regula S. Augustini: Tene certum & dimitte incertum, quam firmat censura Pontificia praesertim huic regulæ oppositam, dum agitur de valore Sacramenti, damnans. Hac igitur adhibita cautela in delectu sententiarum opposita circa Sacramentorum valorem suadentium, utere labore in tuum commodum destinato, pro erroribus typi, quos contextus antecedentis & consequentis materiae facilè indicabit, sicut jam antea, ita & in hoc Volumine, rogo, ut te facilem exhibeas correctorem, atque pro me apud Deum intercessor existas.

Vale.